

Netfréttir

Hátíðarvers

Í byrjun apríl heimsótti framkvæmdastjóri Biblíufélagsins leikskóla KFUM og K, Vinagarð, við Holtaveg, til að þakka þeim börnum sem teiknuðu myndir við hátíðarvers sem valin voru í tilefni af 200 ára afmæli félagsins. Öll börnin fengu afhenta sína mynd á A3 plakati og sápukúlur sem þakklætisvott frá félaginu. Mikil gleði einkenndi stundina og félagið þakkar fyrir góðar viðtökur og vel unnið verkefni.

Heimsókn frá Noregi

Dagana 14. – 19. apríl kom hingað til lands Hans Johan Sagrusten, guðfræðingur og starfsmaður norska biblíufélagsins og flutti erindi á Prestastefnu í tilefni af 200 ára afmæli biblíufélagsins. Hann hitti einnig forstöðumenn safnaða, fulltrúa Gídeonfélagsins og fulltrúa SÍK, átti fundi með framkvæmdastjóra og varaforseta félagsins. Hans Johan talaði einnig á leikmannastefnu laugardaginn 18. apríl um gildi alþjóðlegs samstarf.

Málstofa og málþing

Málstofa var haldin þriðjudaginn 21. apríl um Ólaf Ólafsson kristniboða. Málstofan var haldin í sal Kristniboðssambandsins og á annað hundrað manns mættu á málstofuna. Ólafur Egilsson stjórnaði málstofunni, barnabarn Ólafs, Margrét Jóhannesdóttir, flutti erindið "Afi minn, Ólafur Ólafsson" og séra Ragnar Gunnarsson, framkvæmdastjóri SÍK flutti erindið "Ólafur, kristniboði með sýn á útbreiðslu Biblíunnar" Sýnt var brot úr kvikmynd Ólafs um Kína og Ólafur Egilsson sagði stutt frá stöðu kristni í Kína í dag.

Þriðjudaginn 28. apríl var haldið málþing í fyrirlestrasal Þjóðminjasafns Íslands sem bar heitið „Biblían á 21 öldinni“. Fundarstjóri var Rúnar Vilhjálmsson. Dagskráin var eftirfarandi:

Ávarp forseta biblíufélagsins.

13:10 Jón G. Friðjónsson: Biblían og rætur íslenskrar tungu

13:30 Guðrún Kvaran: Um biblíuþýðingar og gildi þeirra.

13:50 Arnfríður Guðmundsdóttir: Biblían í bíó. Fagnaðarerindið um Jesú Krist fest á filmu.

14:30 Sigurður Pálsson: Biblíufræðsla, biblíuskilningur og menningarlesi.

14:50 Dögg Harðardóttir: Gildi biblíulesturs.

15:10 Árni Svanur Daníelsson: #Biblían. Með ritninguna í vasanum, við fingurna og á vörunum.

15:30 Pallborðsumræður um gildi fræðslu og þekkingar á biblíunni á nýrri öld.

Boðið var upp á léttar veitingar í lok fundar.

Um 30 manns sóttu málþingið.

Afmælishátíð í Uppsölum

Biblíufélagið sendi sinn fulltrúa til Svíþjóðar til að samfagna Svíum á 200 ára afmælisári biblíufélagsins í Svíþjóð. Biblíufélögin á Norðurlöndum voru stofnuð um svipað leyti og hér á Íslandi. Í Finnlandi var biblíufélag stofnað árið 1812, í Danmörku 1814, á Íslandi og í Svíþjóð árið 1815, í Noregi árið 1816.

Biblúsýning á Amtsbókasafninu á Akureyri

Í maí var haldin biblíusýning á Amtsbókasafninu þar sem meðal annars var ljósprentað eintak af Guðbrandsbiblíu, Viðeyjarbiblía og sýnar voru biblíur á ýmsum tungumálum. Laugardaginn 16. maí var síðan boðið upp á dagskrá á safninu í samstarfi við biblíufélagið en það var barnastund sem félagarnir Hreinn Pálsson og Pétur Ragnhildarson höfðu umsjón með. Sungin voru létt sunnudagaskólalög, sögð biblíusaga og sýnd brúðusýning. Boðið var upp á leiðsögn um safnið fyrir þau sem það vildu, kynning á starfi biblíufélagsins og síðan voru tónleikar, þar sem sungin voru lög með biblíutextum eða með tilvísun í Biblíuna og boðskap hennar. Það var Íris Andrésdóttir, söngkona, tónlistarnemi í FÍH og Tónlistarskóla Kópavogs sem söng. Það var mikil ánægja með þessa dagskrá og félagið þakkar Amtsbókasafninu innilega fyrir gott samstarf.